

皇清文穎續編

皇清文頴續編卷首八

高宗純皇帝聖製文

雜著

讀公羊

余讀公羊至許世子止之事不禁廢書而歎曰嗟乎  
迂儒失聖人之旨逞強辭之奪而後世方稱其鼎足  
邱明獨能傳說不亦師心刺謬乎夫許世子之事左  
傳隱躍其言而穀梁則不過曰卽止自責而責之而

已耳至夫子高則直引樂正子春之事以證之一則曰聽止也再則曰赦止也且人子之視疾或一藥而愈或數藥而愈或數藥而竟不愈或一藥而竟不愈者有之矣卽子春之親豈能常存於世其非進藥而不愈者乎則是千萬世之人盡不能免止之罪抑亦盡將得止之赦也夫逆天之誅聖人何忍慢以罪人而又慢以赦人也止之進藥必有不敬誤投之咎非啻不盡不嘗而已然其心終無他故其罪止於是而

蘇轍胡寅之流方且祖其說演義游辭失之愈遠矣

讀荀彧傳

予讀范曄荀彧傳而歎曄之有史材而無史識也夫  
史材非難史識爲難自遷固卽已不免此病而何怪  
乎曄哉蓋遷固之失失以駁而未嘗混黑白妄褒貶  
若曄之稱彧以歸正成仁則何異乎譽盜跖爲義而  
美桓溫以匡主之忠耶善乎劉友益之論彧云身爲  
漢臣爲操謀畫以贊其業業已成矣甫以正論自詭  
其無益可知今夫葛之與裘其相去遠矣然必無今

日葛而明日頓裴之理以漸使之然也操之移漢成  
魏其陰謀密策皆或有以佐之卽其沮董昭之議毋  
亦內慙樊郭外怯孫劉思欲徘徊少待乎而操已不  
能平至於發伏完之書爲狙詐之計禍生空器卒至  
飲酖所爲進退無據孽由自作耳而曄乃以爲崇明  
王畧紓人於倉卒審如是則仲連之蹈東海顧乃謂  
不達時務可乎或之事人不難知而已有顛倒是非  
如曄者吾於是歎史識之難得而任好惡爲予奪者

蓋不少矣

讀唐太宗集

予讀唐太宗集見有賜魏徵詩云云注之者曰徵善  
治酒世所未有信斯言也徵爲諂臣太宗不得爲令  
主矣夫太宗三代以下之賢君而魏徵亦有唐之遺  
直也徵之於太宗知無不言且有不必要而言之者  
矣醺醪善醉之物而謂徵自釀以媚君有是理乎夫  
醺醪媚君封德彝之流或爲之徵而知之將痛切諫  
之而已乃蹈之耶昔梁王酒酣請魯君舉觴魯君避



席擇言而舉禹疏儀狄之事徵豈不知且徵固欲致其君於禹而已乃自甘儀狄必不然矣或曰太宗納巢刺王妃而徵不能諫則徵毋亦好名茹柔之爲而陰有容悅之事或不可知予曰固也夫好名之人激於一時則或能捨死處之順境則不忍忘生闕牆之對徵之能捨死也巢刺妃之佯爲不知徵之不忍忘生也卽不進不敗之醪太宗未必致徵於死也而徵何必亟亟爲之哉三代以下惟恐不好名且以徵之

好名而成太宗之名於無窮者亦已多矣徵豈不知  
治酒之非美名哉千日之醉奚啻十漸不克終而已  
乎實有其事其時君若臣亦必不肯公然見之歌詠  
矣或曰太宗之詩多出於董思恭所爲是則不可知  
也已

記載

記載之失實雖正史不能免而莫甚於稗野之刺謬  
彼以一己之私心設爲莫須有之論所惡者雖伯夷  
之清而不爲揚其善所喜者雖盜跖之貪而謬爲隱  
其惡所喜者雖盜跖之貪而曲爲稱其善所惡者雖  
伯夷之清而刻以求其惡夫不揚而謬隱猶可也至  
於曲稱而刻求則是非顛倒莫可究詰使後人見之  
愚者固以爲必然知者且不能不致疑矣知者致疑

將謂正史亦未免如此害天下之公亂聖人之道非  
稗野之所馴至乎如聞見錄龍川志之紀范仲淹富  
弼論晁仲約之事是已夫范富二人豈非宋室之名  
臣哉設如二書所云則是小人之尤而不可入君子  
之林矣何則仲約之罪或者當時介於可殺不可殺  
之間二人爭之所爲上殿相爭下殿不失和氣者是  
也今乃曰不可教之手滑然此猶可也至曰吾輩首  
領皆不保是何言耶豈有忠臣義士預爲已地而視

人君若三尺之童之理哉使范富具此見是與王安  
石呂惠卿之流何異其生平立朝出鎮致君澤民之  
蹟又何能如正史所傳班班可考若彼乎且二書載  
仲約以知軍事遇盜不捕乃歛民金帛餌之過境事  
蹟詳畧互異罪狀則同至龍川志仲約姓姚而言行  
錄引之別作晁又志稱知高郵軍而聞見錄作光化  
郭公傳譌卽此可見今覈之萬姓統譜有晁仲約時  
與官並合是從晁較爲有據第其職惟注正奉大夫

則其事其人之果否有之固無確據也夫世之隨人是非而無定見者多矣觀此書必且謂范富果有其事仲淹爲能先見弼爲能服善是教後世爲臣者欺其君而盜世名犯少正卯之誅者有之矣邵伯溫吾不惜而獨惜蘇轍尙稱具正知卓識者亦爲此卑謬之論豈其未之思乎抑或未曾質諸其兄以爲何如乎

準噶爾全部紀畧

自古無不誌外夷而實者少舛者多非以其方域所  
限言語不通耶得什一於千百加以魚魯亥豕其堪  
信者鮮矣茲者平定準部止封達瓦齊子一人居之  
京都且城伊犁駐將軍鎮守事耕牧焉念彼原一大  
部落不可無紀故就親詢實事書之亦以便方畧纂  
敘也準噶爾四衛拉特者綽羅斯部都爾伯特部和  
碩特部土爾扈特部是其輝特一部本附庸於都爾

伯特後土爾扈特竄歸俄羅斯故別輝特爲一部仍稱四衛拉特云衛拉特明史稱爲瓦剌其音頗近史所載脫歡太師蓋其始祖元亡而其疆臣分爲三其渠曰馬哈木者卽脫歡之父也脫歡者蒙古準語同爲金今準人語金爲海蘇而蒙古語則仍舊蓋準人自避其祖諱此亦一證也自脫歡逮孛汗其世次不可考孛汗背正妻與他婦野合而生子曰烏林台巴剌太師其母棄之澤中孛汗收養之遂統部落又十



一世而傳至賽音諾顏哈喇忽刺是爲策妄阿拉布坦之曾祖子曰巴圖魯渾台吉有子十二人五曰僧格策妄之父六曰噶爾丹博碩克圖其餘無事無足稱長曰策臣次曰巴圖魯策臣與巴圖魯殺其弟僧格噶爾丹博碩克圖始自藏中回舊部反俗爲汗於康熙年間犯塞戰敗走死先是噶爾丹博碩克圖旣殺兄僧格之次子索諾木阿拉布坦僧格舊臣七人與策妄阿拉布坦同遠逃準語所謂多倫努庫爾者

是多倫者漢語爲七努庫爾者漢語爲友蓋其患難  
相共所謂世臣並赦其子孫七死云及噶爾丹爲我  
兵敗策妄始還和博克薩里收其父舊屬及噶爾丹  
餘衆復成部落并縛噶爾丹子獻闕下遂自據汗位  
子噶爾丹策凌噶爾丹策凌子策妄多爾濟那木扎  
爾其庶兄喇嘛達爾扎執而篡之達瓦齊復因阿睦  
爾撒納之計篡奪其位達瓦齊者巴圖魯渾台吉之  
第七子布木之子大策零敦多卜之孫於策妄爲再

從姪孫其小策零敦多卜則策妄之祖巴圖魯渾台  
吉之弟默爾根代青之曾孫其去策妄世派蓋已遠  
矣先是康熙年間噶爾丹博碩克圖拘繫和碩特車  
臣汗收所屬人衆併入準噶爾鄂拓克其時有和碩  
特之拉藏汗者居唐古忒地卽顧實汗之裔也子二  
人一名丹衷一名索爾扎丹衷由唐古忒仍回至厄  
魯特娶策妄阿拉布坦之女博托洛克爲妻後策妄  
阿拉布坦知其學習哈拉爾查達術

卽巫蠱  
事也

以兩益

夾丹衷身烙死遂令大策零敦多卜領兵六千襲西藏擒殺拉藏并擄伊子索爾扎我

聖祖仁皇帝

勅諭策妄阿拉布坦不得釋騷唐古忒地並發大兵進剿於是大策零敦多卜攜索爾扎逃回厄魯特藏地復平追雍正年間策妄阿拉布坦死子噶爾丹策凌欲與唐古忒和好給索爾扎戶十資養並以博托洛克與韋徵和碩齊爲妻其在丹衷處所生子班珠

爾給戶五資養彼時博托洛克復有孕未產適韋徵  
和碩齊後乃生一子是曰阿睦爾撒納故阿睦爾撒  
納雖爲輝特台吉實與班珠爾皆丹衷之子噶爾丹  
策凌死策妄多爾濟那木扎爾恐索爾扎之子納哈  
查逃往唐古忒將伊禁錮至達瓦齊篡立始將納哈  
查釋放又和碩特羅卜藏車凌者娶策妄阿拉布坦  
之女達什色布騰爲妻噶爾丹策凌時因羅卜藏車  
凌率領伊屬萬戶欲往土爾扈特遂遣兵擒獲羅卜

藏車凌囚之以其妻給韋徵和碩齊二子交烏魯特  
鄂拓克宰桑伍巴什安置至青海居住之羅卜藏丹  
津於策妄阿拉布坦時逃至準噶爾策妄阿拉布坦  
死後羅卜藏車凌羅卜藏丹津二人謀殺噶爾丹策  
凌嗣因羅卜藏丹津被拘羅卜藏車凌恐亦被囚遂  
欲逃往土爾扈特故雍正年間我

世宗憲皇帝索羅卜藏丹津噶爾丹策凌稱已縛送  
至中途聞進兵而止者非詐也蓋彼業經拘繫之囚

故不靳固而且欲以爲奇貨也噶爾丹策凌於丑年  
死策妄多爾濟那木扎爾年幼其姊鄂蘭巴雅爾同  
母出也每以善言相勸禁其淫亂策妄多爾濟那木  
扎爾年旣長遂不受其禁制並聽讒言謂其姊欲效  
俄羅斯自立爲扣肯汗扣肯汗者女  
人掌國事也遂將鄂蘭巴雅  
爾拘繫並殺戮多宰桑其後屠狗盜妻之事無所不  
爲益無忌憚鄂蘭巴雅爾之夫薩音伯勒克遂同  
爾丹策凌庶子喇嘛達爾扎攻執策妄多爾濟那木

扎爾喇嘛達爾扎遂篡汗位有噶爾丹策凌幼子策旺達什者阿睦爾撒納班珠爾欲誘出策旺達什立爲汗後被喇嘛達爾扎知覺遂殺策旺達什阿睦爾撒納班珠爾二人怨思達瓦齊云喇嘛達爾扎旣將與爾同讐之達什達瓦

小策零敦多卜之子

殺戮恐禍將及爾

於是達瓦齊阿睦爾撒納班珠爾三人同逃哈薩克至申年達瓦齊阿睦爾撒納班珠爾復回舊游牧處阿睦爾撒納遂殺其兄沙克都爾據其衆復與伊犁



喇嘛等合謀殺害喇嘛達爾扎立達瓦齊爲汗其次  
卽阿睦爾撒納用事二人仍屬親厚有達什達瓦姪  
訥默庫濟爾噶爾者欲與達瓦齊分領準噶爾猝率  
兵一萬至伊犁與達瓦齊戰達瓦齊敗至舊游牧額  
米爾處與阿睦爾撒納會因阿睦爾撒納計誘執訥  
默庫濟爾噶爾誅之準噶爾衆仍立達瓦齊爲汗達  
瓦齊聽伊犁衆宰桑言與阿睦爾撒納生隙阿睦爾  
撒納本垂涎汗位旣失望遂與班珠爾納哈查及都

爾伯特訥默庫等會同哈薩克將額米爾一帶住牧者肆行擄掠且耕種額爾齊斯爲自固計達瓦齊凡三遣兵勦阿睦爾撒納皆不克其後自領兵三萬至阿睦爾撒納游牧之額爾齊斯蹙之阿睦爾撒納勢不敵始投誠來歸此準噶爾始終構亂所由也至準噶爾鄂拓克昂吉之名各異者鄂拓克爲其汗之部屬昂吉爲各台吉之戶下舊鄂拓克凡十有二烏魯特有四宰桑人五千戶爲一鄂拓克喀拉沁有一宰

桑人五千戶爲一鄂拓克額爾克騰有一宰桑人五  
千戶爲一鄂拓克克里野特有二宰桑人六千戶爲  
一鄂拓克卓托魯克有一宰桑人三千戶爲一鄂拓  
克布庫斯有一宰桑人三千戶爲一鄂拓克阿巴噶  
斯哈丹各有一宰桑共人四千戶爲一鄂拓克鄂畢  
特有一宰桑人三千戶爲一鄂拓克鄂羅岱有二宰  
桑人三千戶爲一鄂拓克多果魯特有一宰桑人四  
千戶爲一鄂拓克霍爾博斯有一宰桑人三千戶爲

一鄂拓克綽和爾有一宰桑人三千戶爲一鄂拓克  
其後復立鄂拓克十有二巴爾達木特有三宰桑人  
四千戶爲一鄂拓克庫圖齊納爾有五宰桑人四千  
戶爲一鄂拓克噶爾維特有三宰桑人四千戶爲一  
鄂拓克沙拉斯有二宰桑人三千戶爲一鄂拓克嗎  
噶斯有一宰桑人五千戶爲一鄂拓克布庫努特有  
一宰桑人二千戶圖古特有一宰桑人五百戶爲一  
鄂拓克烏拉特有一宰桑人三千戶爲一鄂拓克阿

爾闐沁有一宰桑人五百戶爲一鄂拓克扎哈沁有  
三宰桑人二千戶包沁有三宰桑人一千戶爲一鄂  
拓克奇爾吉斯有四宰桑人四千戶爲一鄂拓克特  
楞古特有四宰桑人四千戶鄂爾楚克有一宰桑人  
五百戶烏爾罕濟蘭有一宰桑人八百戶爲一鄂拓  
克明阿特有二宰桑人三千戶爲一鄂拓克鄂拓克  
之外復有五集賽阿克把集賽有二宰桑人四千戶  
賽嗎里木集賽杜爾把集賽推素隆集賽伊克胡拉

爾集賽各有一宰桑人各一千戶其後復立集賽四  
溫都遜集賽善披領集賽各有一宰桑人各一千戶  
桑堆集賽品陳集賽各有一宰桑人各三百戶此九  
集賽辦理喇嘛一切事務喇嘛有六千餘準噶爾共  
六十二宰桑二十四鄂拓克一切供賦俱其汗公物  
其外復取烏梁海及葉爾羌喀什噶爾阿克蘇和闐  
四城回人租入其二十一昂吉爲各台吉所有而統  
屬於準噶爾之汗昂吉者準語分支之謂也綽羅斯

部之達瓦齊一昂吉達什達瓦一昂吉多爾濟丹巴  
一昂吉噶爾藏多爾濟一昂吉訥默庫濟爾噶爾一  
昂吉鄂齊爾伍巴什一昂吉都爾伯特之策凌一昂  
吉達什一昂吉伯什阿哈什一昂吉和碩特之沙克  
多爾曼濟一昂吉輝特之塔爾巴哈沁薩音伯勒克  
一昂吉和通額默根一昂吉多羅特舍楞一昂吉敦  
多克一昂吉葉克明安巴雅爾一昂吉車凌班珠爾  
一昂吉巴圖爾額默根一昂吉察罕圖克阿睦爾撒

納一昂吉博洛果特台吉諸海奇齊克一昂吉土爾扈特台吉巴圖爾伍巴什一昂吉吞都布一昂吉共二十一向於西師詩稱二十一昂吉爲其汗公屬者蓋考之而未詳茲始詳詢縷細如右然各台吉雖分領其昂吉凡出師執役無不聽其汗之令則初所譯者亦未爲大差也統計其汗之二十四鄂拓克九集賽及各台吉之二十一昂吉得二十餘萬戶六十餘萬口成一部落者百十餘年語云十人成之而不足



一人敗之而有餘吾於紀準噶爾之事益見其不爽  
賈生所謂仁義不施而攻守之勢異雖夷狄之有君  
豈能外是道哉

讀周易枯楊生稊辨詁

易大過之九二曰枯楊生稊王弼注云楊之秀也孔  
穎達謂枯槁之楊更生少壯之稊取象顯而易見陸  
德明經典釋文從之考夏小正云正月柳稊稊也者  
發乎也戴德自釋其文確然可信足與弼注相發明  
且微獨王孔之說爲然也唐以前諸儒講易者莫不  
然卽鄭康成書作荑而解爲木更生虞翻詁作穉而  
解爲楊葉未舒辭雖小異義實不相遠也惟朱子本

義以稊爲梯且訓爲根謂榮於下者其說本之程傳而程子則舉劉琨勸進表發繁華於枯蕘爲證夫琨信筆爲文無與易理然亦未明言根義而蕘之訓又爲草琨所謂枯蕘安知非在彼而不在此其不足據審矣程朱之意不過以卦體二爻初陰在下遂以爲下生根梯而於五爻老陰在上則以爲上生華秀夫以二之比初爲老夫得女妻五之比六爲老婦得士夫可也若拘上下爻之象以根梯華秀分上下而言

則不可朱子不又云乎榮於下則生於上旣曰生於上非秀而何矧植物之性其生莫不由根而幹而枝而芽蘖若舍稊秀而專言稊且訓爲根則所云生於上者曷所指乎攷之朱震河上易傳曰二變而與初二成艮巽木在土下根也枯楊有根則其稊秀出稊稊出楊之秀也震未嘗不兼言根而引而至於稊則較程朱之說爲賅舉矣聞嘗綜爻象之辭而覆按之生稊必當以彌注爲正蓋陽雖過而濟以陰故能成

生發之功譬枯楊之生稊始乎秀而具生生不已之象猶老夫得女妻之過以相與也故无不利也五爻生華直當作華絮解陸佃埤雅云柳華一名絮是其義矣蓋楊而至於華絮其生意已過自此以往將就衰落故不可久也亦猶老婦得士夫之可醜也則以象辭釋爻辭其義自合卽以卦體證爻象亦無弗合又何必泥程朱之曲解爲梯乎但稊之爲字雖今時所行大戴禮亦從木然詁解無異義或出刊寫之譌

而張參五經文字則列稊於禾部唐國子學石經本  
漢鴻都之遺最爲近古而木旁之梯則說文廣韻並  
訓木階與發榮義無涉亦不可以不正

讀歐陽修縱囚論

自天子以至於庶人壹是皆以修身爲本修身若何忠孝而已矣唐太宗要父以叛君殺兄以逼父忠孝之道泯矣自知無以取譽於後世故卽位之後於凡好名之事無所不爲人之言曰三代以下惟恐不好名此雖矯枉之論然在人臣或猶可而在人君則斷斷不可蓋名者實之末而君者臣之率天下之情僞萬變而總不出於爲名爲上者竭誠以感下猶懼弗

當而顧先率以從其末幾何其不喪其實而失爲君之道哉太宗好名之事不一而足向於樂善堂集會論及之而莫過於縱囚之特甚歐陽修作縱囚論而評之曰安知夫縱之去也不意其必來以冀免所以縱之乎又安知夫被縱而去也不意其自歸而必獲免所以復來乎是上下交相賊以成此名烏有所謂施恩德與夫知信義哉太宗設詐沽譽此數語足以抉其隱微矣旣又斷之曰縱而來歸殺之無赦而又



縱之而又來則可知爲恩德之致修之此語蓋以開  
太宗之爲詐耳而未免失之以辭害義蓋縱而來歸  
殺之無赦則再縱者豈肯復來乎是畧託於存信義  
者被殺而怙終不悛者反得生有是理乎雖然三百  
人衆矣豈皆能爲君子之所難而無一二求倖免者  
太宗多術人也意彼時必有以密示司理期三百人  
以必來而必免苟其不來必大索天下而誅之且及  
其父母妻子夫三百人者原在此域中也其敢不來

以冀倖免而不來以累及其父母妻子乎史官無識  
未求其詳而載之反以爲盛德之感有識者觀之實  
不值一噓之兒戲耳而歐氏猶以爲可偶一爲之予  
以爲卽偶一爲之亦不可

讀公羊

公羊於隱公之何以不言卽位也曰成公意也旣又申其義曰立適以長不以賢立子以貴不以長夫成公意是矣而以長不以賢以貴不以長之說實甚謬蓋以貴不以長或者祛諸孽覬覦之心猶託於各安其分之義至於以長不以賢則均貴也均貴則擇賢棄不肖有何不可而亦必爲之防微杜漸曰以長不以賢乎且啟賢而賤辛貴而不肖立辛而商以亡是以賢乎且啟賢而賤辛貴而不肖立辛而商以亡是

非萬世之炯鑒乎予以爲棄辛之貴而立啟之賤猶  
不至於屋商之社夫商之宗社不絕與棄貴而立賤  
其是非輕重必有能辨之者知此則公羊之說之謬  
不亦章章明甚哉而劉頌引其言以爲事情之不可  
易者識見庸愚固不屑再闢矣且以天下與人易爲  
天下得人難堯舜禹傳賢傳子之事韓愈論之詳矣  
夫與賢之說後世固不可行顧於諸子中獨不可擇  
賢而與之必拘於以貴以長之小節而不爲天下萬

民擇賢君而立之是直以祖宗社稷爲輕而以已妻  
媵娣爲重千金之家有所不可而况天下萬民之大  
乎或曰後世嬖幸妾而立少子以致敗國亡家者亦  
有之矣不若守公羊之言爲無患雖然嬖幸而立少  
子未必有其一二不擇賢而守分將十必居其十審  
是言則公羊之說爲宜從乎爲不宜從乎

讀召誥

詩三百一言以蔽之曰思無邪予讀召誥之篇求其  
一言以蔽之者莫若曰曷其奈何弗敬蓋召公因成  
王始政拳拳致告蔡傳所謂究其歸以誠民爲祈天  
之本而又以敬德爲誠民之本一篇之中三致意焉  
則所謂奈何弗敬者非挈一篇之領要乎夫奈何者  
一唱三歎之意言有盡而義無窮奈何者更有不忍  
人之心以不忍人之心行不忍人之政則敬之施於

外者也敬勝怠者吉義勝欲者從然必敬勝而後能  
義勝則又敬之存乎內者也內外交養誠實無妄祈  
天永命其弗基於此乎茲因謁明陵而思及受命保  
命之要必當以奈何弗敬爲棘且君者

天之子也

天者君之父也父之於子無不亟其愛子之於父當  
無不亟其敬然及其失父之愛一再失其敬者猶示  
以警以訓誨之至於訓誨而弗改則父亦弗愛之而

已矣嗚呼可不懼乎可不敬乎歷代遙矣不可屈指  
數明之事則近可徵也如永樂之篡位大行誅戮應  
其亡也而天弗亡之正統之北狩應其亡也而天亦  
弗亡之正德之荒淫失德應其亡也而天尙弗亡之  
此非慈父之道其罪而仍有所顧惜乎必至萬厯怠  
政天啓童騃崇禎有猜忌之失無恢復之能而後亡  
之讀史而有受命保命之責者可不知懼知敬乎人  
莫不飲食鮮能知味也人莫不讀召誥鮮能知要也



茲舉其一言以蔽之者於謁明陵之日後之攬者亦  
可以絜矩知吾意矣

讀洪範

洪範一書爲箕子衍神禹之言以誥武王者不惟姬  
周一代制治之源卽萬世帝王制治之源也九疇之  
敘在君則係於極之建不建在民人則由於訓之行  
不行蔡沈之言盡之矣而予獨以爲萬世帝王制治  
之源者何蓋君者民之本也譬之木乎本正而枝自  
隨故疇雖有九無一不關於爲君者之一身一心可  
不慎乎然予之所以有會心者固在皇極之建九疇

之省而原始要終則在乎第九之嚮用威用矣予蒙  
天篤祐得建五福五代之堂其說已見前記茲以六  
極自省幸而無其五而不能去其一所謂憂也春憂  
雨之不足夏憂雨之或過秋憂歲之不登冬憂雪之  
未降無不先時忖度切切於懷至於古稀說之八弊  
時憂其或萌合寰中之萬民時憂其失所所謂先天  
下之憂而憂者不可究極而後天下之樂而樂者曾  
無幾希是則此憂不能去而亦不忍去且更不敢去

也夫季世之君但知其樂而不知憂以致受大憂而不可救藥者多矣余幸於六極中免其五而得其一則此憂也將拳拳守之而惟恐其失之或者邀

昊貺符宿願得歸政之後庶可免此憂乎然更當教子孫體余之憂爲憂方將萬世守之庶幾永承

天眷是則臣民或可去其憂而爲君者終無去憂之道萬世爲君者其尙勉守此憂庶幾不致大憂而保後樂尙敬之哉

連珠

恭祝

聖母皇太后七旬萬壽連珠

臣聞山川納祿厥彰祥源苞符延洪斯引福紀是以  
泰筴執契推貞恒於

璇庭洛文則書敷元吉於

瑤卮

臣聞王以任養乎物坤珍旣闡申以重巽乎命天庥

是滋是以璿流毓慶歲陽聿徵

大德金根兆祉支位用輯

繁禧

臣聞子半肇統斯天地見於復律元正候則鍾呂還  
爲宮是以迎長日之至履端撓甲求中聲之先萌柝  
伶簫

臣聞軒瑟調徽帝絃暢其醴攬義畫觀象天數諧平  
掛楫是以上

瓊禕之曼壽探萬萬以介

大年溯錦悅之誕祥合五五乃叶

令節

臣聞一六乘數七得相生之始萬億基算十爲遞成之積是以

寶鑑駢美而疑祚譬諸章啟葩元幾籥搏總以迓釐時其圖衍疇策

臣聞四府統元蠓蠕懷而煦嫗五德盛木勾萌鬱以

藐茂是以

承天育物則嘒嘒登春安土長人乃穰穰

綏壽

臣聞鴻化烟煴亭育博其愛醇意彌浹恩勤大其慈  
是以合萬國之歡惟殷祈頌依

三春之暉敢日報施

臣聞融風翕習八絃欽於大順協氣氾濩六幕蒸爲  
太和是以挹



祥輝者式金玉之度誦

德音者譜韶謨之歌

臣聞燠沐垂溫布德孔時徽柔導訢孚心有惠是以  
恩紀渥洽邇澤懷其子良慶駢豐施逖光函其愷悌  
臣聞居敬直內允儷乎方儀作肅秉心載錫之純佑  
是以盤盂之琢由

戢孔訓而安珩璜之型惟

服周銘則壽

臣聞通復有源含萬而立幬載所積得一以凝是以  
德淵懇款爲

聖人之本景撰悠遠惟

至誠之徵

臣聞符乾媿昊乃以時行齊日得天曰惟久照是以  
華鐘景興

躬表獲於求衣銅漏課勤先劬心於問燎

臣聞示本於俗太素扶其質崇儉於上皇風播其徽

是以

訓垂國闡不侈廟軒之御道端

宸掖惟曳繻練之衣

臣聞霄雯佑德厖禡治於化光虹樞迪熙醴粹孚乎  
旭卉是以篤

皇緯之祐靜言申虔稟

淵謐之集慶惟寅畏

臣聞有節詒慶厥初顯昭周原建家克昌基本是以

思齊式禮嗣音於嶽牒懷福履綏績順於

懿壺

臣聞坤輿厚載廣輪資其大生箕範敷錫繇條用以  
蕃庶是以

泰元富釐德亨乎品物圓舒麗象好從乎風雨

臣聞澍潤般裔鳴鼓時應甘滋震灑滿缶有吉是以

撤

瑚御而節步速委雲於靈霽降釦礪以達忱大嘉貺

於太乙

臣聞三盆效功美利其溥六駟興事前典斯劭是以  
鞠衣時薦分繭練以令辰桑壇歲臨濯龍宣夫

徽詔

臣聞星軒承曜順彰皇闡蘭掖景化職懋彤史是以  
母範作則四教迪穆雍之祥內政式序九御憲令善  
之軌

臣聞文母貽緒麟振其趾幽室衍支瓜繇其腴是以

含長樂之飴兆千億以蕃盛環

天安之與裕雲仍而愉悅

臣聞族雲垂於霄堦蔭匝磐石榮光燭於宿海潤盈  
玉潢是以爲善之樂甄埴乎

誼美展親之隆泳翺乎

德洋

臣聞蘋澗淑化漸訖九服雁塞熙度靖共六珈是以  
油駟朝正拜

堯舜於宮椒殿燕喜合中外爲家

臣聞鞆譯萬里宣徽則通淵鑒億臣慕義斯至是以  
干呂入律占

慈仁而奉琛航解梯嶂聞

錫類而獻寶

臣

聞叩籠雖嶮稜武可讐桀木雖獷嘉信所懷是以

鑾碣櫓而鞠旅威暢作徵僚

璇器而底績格先干階

臣聞來庭肇功常武昔譜於乙亥款關拓疆都護初  
置以戊巳是以掃伊犁之穴竹書紀而符吉銘格登  
之崖

鴻稱熙而歸美

臣聞蒲類以西鑿空所未度蒙汜之濱仰流則偕徠  
是以櫜弓定勲版圖旣綜隸屬國磨肩告捷雲物乃  
象

禧觀臺



聞瑤池彈璇必陳充庭之樂蘭陞協律廣集介雅  
之章是以鞞鞞新歌貢音於際裔花門小部列伎於  
舞場

臣聞寶盈丹邱露瓊琢瓊珍香若水桂實纂棗是以  
于闐縹英三米則擢靈碧樹筠沖醴甘四核則扇芬  
蕙草

臣聞金萱榮庭億葉煌扈星筠周阿貫時夷與是以  
敝

高闈而翼祺則篤其慶鞏

慈宮以斂福有那其居

臣聞閭風暢於岷嶮九光燭彩恒春藹於巒雉四序  
佇馥是以

西那所都松竹秩其芋寧

南陔載循室室劑以涼燠

臣聞虞馨九成儀足節以樂心萊綵五色舞欄遍以  
隆養是以

鈞庭辨華筵

千萬壽而燕衍曾城茗亭奏十二安而音墮

臣聞履安之吉靜而充符恒固之應動若操券是以  
頤性時泰備庠徵以用康

禔躬日強叶亨衢以行健

臣聞萬八千歲之朔攝提貞孟三百六旬之首義和  
授圖是以朝元

長信率臣來而拜闔闔上壽

慈寧具家慶而飴屠蘇

臣聞搏桑曠溫候晷知贏昭華棣通猷琯依永是以  
揣稱受日駐輪於量陽怡

顏獻春調饒於初景

臣聞農祥慶其豐稟藻翔洽夫億兆泰簇鳴其豫鳳  
嘒離喆乎二六是以洞庭斯張導穌軒樞幽堂用贍  
狂情文囿

臣聞鼇炬冠山爛若霞電龍燭輝夜爚如星虹是以

月宇

嘉娛燄鶴騰上而扈扈霄崢麗賞火蛾綴空其熊熊  
臣聞稊賓亭午引年以昌陽九節長羸殷仲延籙以  
雜組萬縷是以迴嶼艤鷁玉鱠羅於蓬池撇波躍龍  
金支颺於

華渚

臣聞洞淵之蘼蘆蘋瑛琢其鄂昆流之苓璫毘珠垂  
其房是以

文疏引薰澤芝馥於五沃芳盥調露水滿脣以千常  
臣聞三五而盈璧爛朗乎澄顯八千爲秋桂窅窕其  
古柯是以

慶霄延望舒之規環磬鏘韻修齡酌皐塗之液金罍  
穆波

臣聞菊潭滲甘滋以永年萸林綴朱佩其陽日是以  
芳醴鬯節則九英載馨粉餐飫豐則萬寶咸實

臣聞玉積縣圃不若北陸沍澤鴻戲鏡海奚翅南溟

培風是以太液磴卽國俗循而習武嘉平儲與

慈愷蒞而旌功

臣聞繚垣規圓惟南乃以建其極襟苑宅奧非海莫  
能喻其大是以飲池鹿馴扈

班麟之車比屋鱗次翼

儀鸞之蓋

臣聞高山天作度其隰原豐水東注自彼沮洳是以  
掖

輦長白則駢苞之樹森遡澗混同則圓折之珠出

臣聞霞砂砦泉溫池沸渌雲根呀谷古嵐靈霽是以

氣霽波灑

葆生之永旣長翠積巖館

都福之庭斯在

臣聞修序冲景暄清所以均節秀臯清區爽塏所以

承豫是以鍾峯嘉涼升眺昭其宜鏡波澄華

憩遊得其助



臣聞懷瓊之獸呦而林衡告獮獮雲之駟同則圉奚載鑾是以

鏤象導夫金郊邁彼甫草珍庖尚以馨饍親乎上蘭  
臣聞填星貫於中央標建珠緯審門誅乎太室簡儲  
石函是以胥庭椒瑞啟洞天之六

交路展衛呼曼齡者三

臣聞東爲羣物之始虞狩肆觀岱惟方嶽之長曾瞻  
奄有是以青社班春詡蒼祇之榮茲日觀賓鳴晞若

華之曜久

臣聞岷江導源川增其長勾吳茂裕富煇於地是以藻舟翼泛權鼓奉

安念之祺鱗隰稱秀簷茨拜溫給之賜

臣聞東南之美竹箭楠蠶斗牛之野桑腓鋪荼是以陟虎林而續湖則八繭摘錦臨樟亭而祝海則千巖蔚雲

臣聞臺懷懸居妙持清涼之宇室利演乘普現吉祥

之雲是以曩霏金花最上應瑞乎香界鬘涌寶卮無  
量同

壽乎祕文

臣聞一和扶輪階符繁其蔭三雍育才鬻市榮其枝  
是以嘉植承林平絳甸協洽

開秩喬柯兆苑於豐雅棫樸誦詩

臣聞金方致環仵來琳館梁鄒卽鹿祝敝畝邱是以  
甲子周綺稱兕麋至於象譯庚辛嬋純靈應馴伏於

塞秋

臣聞鈞鈐之潤可以在玉衡之平旗翼之壽可以窺  
瑤光之正是以溟嶽和晏筦運乎

璇極蓋興清怡囊括乎金鏡

臣聞豐融晷於穹宰而農扈告稔盈冲端於柔祇而  
富媪披英是以陰陽區敷則調燭布其大洽柯穗埴  
塿則普淖誦其宗生

臣聞錫羨阜運則衢多期頤之嬉含淳敦風則居有

萃睦之協是以闕耆牂樂皆

熙光所陶陝閭悉義實訢藹所浹

臣聞重光協乎鳳紀次先甲之三已盛苞乎星序際  
正陽之四是以嶠西

介景曰昌若時而悉新弧南表瑞萬物成章以方熾  
臣聞軒闥祚縣萬區陶珍於胸鼎祔幄祉錫九寰  
醲乎衢尊是以景飈融貺

鏐檢躋而流慶

湛澹覃澤鵠書翔而逮恩

臣聞霽陰之垂不遺被褐祥風所灑暨乎室衡是以  
作人左右倬爲章於壽考宜譽先後篤惟

總於周京

臣聞萬年賡庥拜嘉於召虎三壽頌眉延喜於子魚  
是以

弗祿引康翮羽集彼藹吉熾昌式燕黃髮宜茲樂胥  
臣聞以天下養者膺禔孔厚惟庶民從者敏愉大同

是以臺萊統

尊臚稱闕夫蒼赤川阜增嘏臚懽詒於瀛滢

臣聞大圖彪列蘿圖輯於堯紀泰鴻環均藻華昌平  
姬籙是以三光同衡以肇祚覘祥

表增七政比躔以摛耀儼緯詞屬

臣聞象載斡斡九垓均禧偉兆郁郁億齡展盛是以  
洊申無疆

慈善膺洪算之茂誕昇多益保佑錫

純叔之慶



頌

掖

輦紀慶頌有序

我

皇祖孝侍

兩宮於凡先意承歡冬溫夏清行樂宮中者無不極  
天下之養示孫曾之則而

翠華巡省蓋無虛歲亦莫不虔奉

安輿

膝前娛志則又自古帝王奉東朝以申愛慕者所無  
有也予小子敬仰

前規惟懼弗紹

聖母皇太后亦以繼

祖烈恤民艱母忘我國家習勤詰武之規諄諄是訓

踐阼以來省方問俗必敬請

慈闈臨幸

皇太后怡顏首肯曰皇帝展義示度不宴息深宮子  
所喜也夫慶壽致誠宣德陪奉偶一行之書史  
稱美未聞教之鴻猷勛以義方如我

聖母者也而

大安所過無不詢穡事驗民俗老婦黃僮覲光莫禁  
賞沿於途周逮於富故凡額手而祝

大齡者人一其聲聲一其誠則知我

聖母萬萬壽無疆應於人情是徵敬以邇年侍

輦所歷稱頌八章詎能揚

徽音於萬一用志欽

懿訓於弗諼若夫

壽康承慶

暢春行時率臣民而祝純禧攜孫曾以介眉壽日暘

曰雨塵

慈懷隨地隨時聆

德誨芳溢彤管蓋不可殫述矣

崧高申祝

喬嶽維崧宅是土中際時屢豐展義觀風聿奉  
安輿聿遵伊洛黃雲擁途兆庶孔樂二室華蓋峻極  
于天祝我

聖母壽萬萬年聞呼者三艷彼史筆曷若我民口億  
聲

五臺禮佛

有蔚清涼曷殊示相琳宮鐘貝五頂相望緬我

皇祖龍馭載臨

聖日在天光照祇林肅肅葆羽翼翼

鸞輅言瞻臺懷言嗣

神武猊座蓮臺不可思議佑我

文母百福備致

盛京展謁

於錄盛京崇基天作佳氣鬱葱周豐殷亳載畋北塞  
載莅陪都巍哉紫殿殷軫皇圖崇政清寧承

歡廣宴賜復賜醕澤洽圻甸皇矣

祖德長發其祥燕翼垂庥

聖母之慶

岱嶽觀日

粵戊辰春駕言東巡旣仰杏壇遂躋岱宗

叶

匪慕漢

唐用事封禪以祝

洪釐介祉錫羨敷彼扶桑升於東溟芝童綠髮玉女

雲輶

慈恩載普覃齊浹曾戴我

文母式歌且舞

興安閱圍

皇祖詒謀歲事秋獮並塞名王選徒屬韃於皇

聖母法

祖是勛金韉氣霽靈囿土沃爰命三虞爰整六飛磴

虎洞麋周陟合圍幔城迢迢凌彼崇椒

顧之色喜



德音孔昭

金山渡江

於樂南國望幸有年載承

慈命來游來觀濟河涉淮慰彼傾心扶攜扑躍總總  
林林川后靜波屏翳送帆京江瀕海浮玉嶠崑崙庶  
孔愉伏迓

金輿頂祝

佛母香華載途

聖因視膳

載信吳閭于邁浙水佳麗明湖披圖可指瞻彼聖因  
聖蹟所留仰企

前徽扶

輦春遊隄樹簇錦江潮曳練南屏窈窕兩峯葱蒨晨  
羞日視宛若

宮庭以天下養勉紹

先型

江寧觀射

旋船吳會言循江潯虎踞龍蟠鍾山元武作鎮南服  
我旅我臣來觀

行殿翟弗組紉聿敷

湛恩聿申

懿訓予所有事文揆武奮詰戎保泰仰承

聖慈超任越如福履永綏

恭祝

聖母皇太后八旬萬壽

鴻稱積慶頌

謹序

臣

聞思齊顯德徽乃播音繁祉介眉慶宜歌頌

維天保之福孔固以莫不增由嘉樂之佑自申  
必得其壽絜萬萬而推軒紀旋八八以暢伶簫  
列纂組以成文效臺萊而稱祝恭惟

聖母崇慶慈宣康惠敦和裕壽純禧恭懿安祺皇太

后

陛下承天資始敘福用敷倪摯續幸駕妣任之毓

粹撫原正域本嫺簡之儲祥俾

壽而臧昭

德之致日星以爲紀歲以爲量惟曰至于萬年子孫

其逢吉

身其康疆推而放諸四海茲者苞符

介祉圖筴

衍祺並悠久于兩儀屆延洪之

入袞年符丕冒運際悉新月陽明庚兆大橫日德則

酉占留熟駢彰

壽牒疊奉殷詞賦沿古詩之流

五旬倏啟頌集羣經之液

六甲環週泊乎

七十萬壽之年祥呈合璧爰有六十三章之作體演

聯珠爾乃吉祚大來熙臺共上屯豐濠汜晦服

紉牛阜遠渥注道通縑馬耕有餘者三九扇景  
漊甘蠲惟正者萬千鏐租漕糴三依

綵鷁標水誌以恬瀾四奉

和鸞漲沙臺而輦軸接析津之星次海近添籌寫仙  
嶽之真形山基積壽廣途銓士彙吉茅茹特榜  
興賢作人棧樸槐街鄉祿越百歲以扶鳩棘院  
耆儒錫乙科而鳴鹿門旌人瑞翁媪齊登書授  
民時義和增錄凡皆寅循

慈訓九垓布大順之庥實惟申錫

景禧六幕蒸太和之氣況復

純嘏彌厚戩穀罄宜秉

莊敬以日強茂

養恬之時引

松齋留憩

頤凝性以加康蘭塞迴瞻喜

和神之益健



膝前子帝

蔭越六旬庭下孫曾支蕃五世負黼展而臻三紀萃

寰瀛以奉

一尊愛日方升

春暉久煦每當嘉辰令節宴侍

顏和荷承

溫語之有加

謂可禮文之從簡言不稱老敢紆鞠歷之虔命滋益

恭彌載

恩勤之德且夫高堂華髮競羨萱榮前席綵衣艷稱  
萊戲適大年之眠食事美含飴羅問旦之兒孫  
人夸點領此在一門有喜便成家慶之圖矧乃  
六合同春罕觀史書所紀予小子並受其

福故能以孝事

親我

聖母長發其祥是謂承

天之祐慶逢祝

嘏忻展呼

嵩敞都福之庭

璇宮賁采崇歸善之典

璆冊肇尊寶甕八鴻春盈瑞露金函四果

壽普慈雲擊壤聽歌劇衢稱竿簞筐備陳庭之實絲

綸宣

錫類之恩嘉予九有臣民共茲大慶外逮四裔君長

莫不來同盛禮咸昭上儀具舉躋一世於仁壽  
無疆惟庥合萬國之歡心有秩斯祐臣愉股酌  
斗忭溢循陔十六字義釋

鴻稱億萬年詞申燕喜結纏綿之至性緒倍抽絲迓  
曼羨之

貞齡繡徵添線鸞璇八疊王母歌

介壽之章雲錦七襄天孫獻

長生之錄兆綏

洪算載晉長言作頌曰

昊緯凝命誕昇我大清累洽重熙率俾絃濩  
厚載光大至哉

坤元登虹附樞亶毓祥源肆台小子依

暉卽阼尊以

聖母養以天下叶樹

德孔峻納祿式固寬乎煒而三五靡並

萬福來崇

一人有慶

右 崇  
慶第一章

維

聖母之慈以篤貌躬鞠育顧復自我童蒙六十年于

茲與日俱長

叶

尙迪

懿訓聿臻大同夙興

瓊闥其曷敢不宵衣分甘

頤席其曷敢不旰食

叶

禮哉負展惟日孜孜佐

歡適

豫顯副

翼貽宣昭中外維

聖母之慈

右 慈  
宣第二章

鴻化奕奕

德音洋洋亦旣康止匪居匪康掖

輦行慶以巡四方壽相臺懷天中嵩洛齊魯東奄吳

越南宅

叶

陪京甸服及河喬嶽

惠綏萬民慶賞乃作

容顧以澤而康而安

湛恩既申祝頌闕歡

右 康  
惠第三章

安土敦仁坤輿廣生理大物博蕃庶盈寧秋弛輪結  
夏貸稅畝藏富在民財可以阜數逾千萬

推澤敦厚朝陽翽羽中沚菁莪有孝有德式舞且歌  
以

和召和乃大和會調幕登臺兆民永賴

右 敦  
和第四章

邇福垂裕裕乃以民寧長之養之嘒嘒羣生遊於



化宇皇之人多壽其爾有位國之耆耇或祿成均或  
續賢書或偕期頤綽楔表閭三元甲子循環遞嬗維  
臣庶介

釐維

聖母錫羨合萬萬人奉萬萬算

右裕  
壽第五章

猗歟

純禧同天所壽皆定武功粵晉

大號久底敕寧文同五譯馬首龍駢雁臣玉帛戊巳

告豐畋田宅宅一尉一候誕受方國維

德之純膺

禮單厚遠至二萬里奔走恐後自痕都以東咸祿獻

壽

壽本  
禧第六章

周銘有言惟恭則壽怡哉

聖母徽柔是篤

叶課晴問雨

心勤占農率作蠶事分繭稱絲效功

暢春祊帳

壽康莘宮

端居慎動示桀表冲恪秉

淵懿克勤克儉彼哉明總徒飾衣練彤史書型莫窮

紀撰

古恭  
懿第七章

全德胥彰

顯名丕揚弗祿多益

慶辰迎長儀備禮洽昇典何加摺

冊

東朝隆以苞華

令善高厚莫贊一詞吉語臚實上祝

安祺其

安維何如彼南山其

祺維何福海大環引申繼續示珍

紀年

右 安  
祺第八章

贊

闕里十贊

有序

戊辰春二月東巡狩奠

先師法

皇祖也日戊寅至闕里所司以詰朝舉祀禮具儀聞  
朕惟車駕旣蒞廟貌遙瞻隔宿偃居非所安也  
爰以始至日辦香瞻謁肅拜以布誠待質明而  
釋奠斯於禮爲宜乃易吉服率近臣入萬仞宮

**FILE**

粹容如日月麗天

聖蹟似江河行地既而周循右序更轉左廂所云

金絲詩禮故井故宅無不考其蹟而想見

夫子之遺澤至今存也爲之獻歎爲之虔悚夫

孔子萬古一人也誰能贊之然天地不言其高厚而生天地之間者無不知天地之高厚是贊也

亦如是云爾

萬仞宮牆

芑予自芻被服

聖言明德新民知易行難  
頤有素誠瞻謁尼山亦既  
蒞止敢云得門

奎文閣

奎婁垂象爰在魯東

天子之文天地並隆煌煌

御書充牣其中

先聖後聖其揆則同

手植檜

交欄肥壤厥有檜株

先聖攸植繫手澤餘幾經枯榮左紐右紆造物憑護  
孫枝扶疎

杏壇

憶昔緇帷詩書授受與有榮焉軼桃輅柳博厚高明



亦曰悠久萬世受治杏林何有

禮器

祇謁

先師載觀禮器犧尊象尊伊古之制有道存焉儀型  
攸繫申命太常記予初祭

聖蹟殿

明王不興夫孰能宗豈無宗者邈矣莫從鐫勒茗華  
景仰遺踪七十二年雲中見龍

金絲堂

禮樂詩書金絲萬古豈繫魯恭廣宅斯舉在左移西  
亦惟其所懸甕乃神

夫子不語

詩禮堂

昔者趨庭詩禮垂訓維言與立伊誰不奮九仞一簣  
願勉乎進御堂聽講景仰

聖舜

故井

蔬食飲水曲肱樂之旣清且潔汲繩到茲我取一勺  
以飲以思嗚呼

宣聖實我之師

故宅門

居廟之左厥門斯故藻績不施意存後素徘徊仰瞻  
心焉學步告爾後人由茲義路

南極壽星贊

高弧之南曰有六星聚而爲體一老人形一六爲七  
七日復來

慈寧大慶七袞爰開綺眉聃耳曲錄其晉長頭豐額  
絲髮飄蕭老人謂予來祝  
懿壽如髮壽算無疆悠久

銘

座右銘

凜于豐亨適求厥寧思艱圖易居安慮傾堂下萬里  
無恃爾克明民方殿屎無恃爾善聽無矜大名無侈  
頌聲止欲於未萌防危於無形日慎一日先民是程  
昔之人有言曰堯業業舜兢兢臨淵履冰式鑒茲銘

養心殿銘

人心惟危在閑其邪道心惟微在培其芽其閑其培  
皆所爲養操存含亡毋須臾放叶有如時雨沃此寸  
田大公順應動直靜專動匪憧憧靜匪寂寂矧其爲  
君更宜乾惕一念之善百禩蒙庥一念之惡萬姓貽  
憂養之之方存誠主敬克己復禮外王內聖孰本孰  
末外由內施任重道遠責萃君師朶殿崇崇顧名崇  
義作此銘辭永訓後世

宮殿四銘有序

宮殿者所以受之

祖考傳之子孫建極撫辰以治四海且鴻稱煌煌顧  
名思義常恐羞之其視盤盂几杖日用之物不  
綦重乎因讀韓愈五箴有警仿其體爲四銘焉  
大哉至健純粹而精昭昭成象蕩蕩難名四德擅用  
六位時乘靜專動直資始大生我

祖我

皇清之治  
考奉是丹楹五福敷錫萬國咸寧敢恃崇居惴惴矜  
矜益慎體乾惟皇永清

右乾清宮銘

萬物致養是曰

厚坤安貞廣大配

天爲元昔在

盛京

清寧正寢建極熙鴻貞符義審思媚嗣徽松茂竹苞



神罔時恫執豕酌匏廣博無疆黃中正位以繼以繩  
惟日欲至于萬世

右坤寧宮銘

四德何以首元四時何以首春仁者人也要莫大於  
親親刑寡妻以至兄弟民同胞而物吾與皆由此施  
關痛癢而肫肫然其所包者廣是以孔子對門人之  
問不同而莫非由已之所存人盡宜勉又何況乎爲  
君吾用是居昭仁之殿怵然惟恐有愧乎斯言

右昭仁殿銘

求全之毀吉德也辯之不已是惑也不虞之讐凶德也居之不疑是惑也知惑不爲直言其來知惑而爲諛言其滋諛滋悔生直來其亨宜已而辯汝奚爲善宜疑而居汝惑奚祛屏乎營乎其思德之所宏乎

右弘德殿銘

乾清宮五屏風銘

有序

予年十二時始解文義每侍

皇祖於乾清宮得瞻御座後屏風集諸經銘語卽知  
綜括治道無遺而爲君者必如是然後可謂盡  
君道也踐阼後益用以自勵思欲衍繹諸句各  
爲一銘而理精義博日引月長三十六年於茲  
予亦六旬有一矣昔衛武公作抑戒老而自警  
也予侍

聖母不宜言老而自警之意則不可無夫此集諸經  
語誰不能成誦然言之易而行之難語云適百  
里者半九十里苟所行不符合乎所言予愧不滋  
甚哉

正中四則

自我民聽

天以爲聰自我民視

天以爲明

叶

無曰高高在上惟

命不于常奈何弗敬夙夜不遑純佑惟休惟恤亦無疆

右惟

天聰明

粵我

列祖憲

天惟聖宅中圖治敬朕義勝允茲克明佛時仔肩以似以續惟曰欲至于萬年

右惟

聖時憲

予有股肱予有心膂恤小民之依惟予與汝曰惟欽  
哉厥欽匪從陳善弼邪無私則公

右惟臣欽若

至弱而不可勝至愚而不可欺心焉懷保庶其從治  
厥類有四厥數無萬暑雨祁寒日者曰怨思艱圖易  
適求厥寧用顧畏于民艱焉是觀厥成

右惟民從乂

左次二則

百姓注耳目一人孩之萬幾凜旦明一人裁之惡乎  
危于不知惡乎失于好逸惡乎損招于矜驕

右首出庶物

人莫不衣食也足之則寧民猶水也澄之則清使菽  
粟布帛如水火亦其難矣豈可虛詡昇平

右萬國咸寧

右次二則

和樂且湛君子之愷叶平易近民君子之悌君子終  
日乾乾體仁長人大都爲爲君者而言

右愷悌君子

譬如北辰居其所而衆星拱之德斯要矣爲則者心  
誠奉之苟失其德孰與爲則戒之愼之斯焉惕息

右四方爲則

左末二則



在昔文王卽康功田功志厯惠鮮受命惟崇詰戎罔  
要黷武非賢以是爲功失之天淵

右功崇惟志

曰宵衣豈誠宵衣乎曰旰食豈誠旰食乎卽誠宵

旰而心不在焉亦得謂之眞勤乎君者臣之師乎

將以督人而已固可遺乎

右業廣惟勤

右末二則

爲君奚難難於知人唐虞已然而況而今叶忠邪莫  
辨善惡紛陳貌不易察心更難識叶量材授職各有  
分司廣諮博訪或稱不知在彼則可在我則遲蒿目  
焦心分憂其誰

右知人則哲

三代以下治世常稀其故云何安民莫爲安民若何  
莫如惠施惠心勿問元吉易辭

右安民則惠

寧壽宮銘

寧咸萬國壽先五福宮用題額文叶義淑於赫

皇祖奉養

慈闈

孝惠爰居愛日延暉小子踐阼茲厯卅年設復廿歲  
八旬五臻敬思

仁皇卜號康熙六十一載今古誠稀同以爲艱敢期  
過益况值耄耄歸政理得適新是宮以待

天庥企予望之願可如不授終奉

懿其禮自殊斟酌損益匪曰侈圖殿稱皇極重簷建

前宮仍其舊爲後室焉

我朝規制

寧壽宮

慈寧宮爲奉養

東朝之

所是以前殿卽以宮名並皆不施重簷有深意也恭

遇

聖母八旬萬壽朕始於

慈寧宮增加前

殿重簷以崇尊養茲新葺寧壽宮待予歸政後居處

則爲太上皇臨御之所宜有前殿受賀因題額曰阜

極殿制用重簷而寧壽

執豕敬

宮之榜則移於後殿云

神我朝舊制異日遷居禮弗敢廢

清寧

坤寧

祖宗所奉

盛京大政殿後曰祀神之所祭畢

清寧宮

祖宗時

食祭肉

國初定鼎燕京則於乾清宮後殿

坤寧

宮行祀

神禮一如

清寧之制至今遵循舊章余

將來歸政時自當移

坤寧宮所奉之

神

位

神竿於寧壽宮仍依現在祀

神之禮

朔吉修

祀寧壽斯踵雖謝萬幾寧期九幾始予一人壽同黔

黎告我子孫毋逾敬勝是繼是繩永膺福慶